

295

nier zu fufs inliefse. Wie nun der turnier ain weil geweret,
do begab sich das gut schwach mendlin zu nahe zun schran-
ken, das in sein widerparthei erwüst, in beim kopf name
und über die schranken zohe. Es ward ain grosf gelechter
5 von meniglichem, als das mendlin uf den schranken zoglet.
Der Pigeus wolts nit [gut] haifsen, und waver der hoch-
zeiter nit hette sampt ander hernach darvor gehandelt und
die sach vertragen, so wer ain wüster lerman daraufs wor-
den. Die hochzeit weret etliche tag. Als der herr von
10 Bossu abschied, do luede er die herr zu sich gen Bossu.
Von demselbigen haus sagt man, das dergleichen in allen
Niederlanden nit seie, das von artlichem gepew und vilem
marbel nit allain wunderbarlich und ein fürbunt, sonder auch
mit dem kostlichen hausrat und ander zugeherd in ein haus
15 also gezüret, das sollichs ein königliche wonung und resi-
denz mögt sein. Aber es zohe mit dem herr von Bossu
niemands, dan der graf von Solms mit seinem frawenzimmer.
Graf Wilhalm von Eberstain blib noch etlich tag zu Sant
Tomas bei seinem sone, graff Phillipsen, auch seiner haus-
20 frawen. Graff Bernhart und graff Phillips von Hanow raisten
durch Flander gen Anddorf. So rit graff Frobein Cristof
seiner ufgeprachten und erlangten freiheit halb, davon hie-
oben meldung beschehen, den nechsten nach Brüssell an
hoff. Da hielt er an umb fürderliche verfertigung der frei-
25 heiten. Als die herrn noch alle zu S. Tomas bei einandern,
do haben graf Wilhalm von Eberstain und sein sone allain
mit der hochzeiterna fründtschaft gehandelt, belangen den
heurad, und ist der ander grafen kainer darzu zogen wor-
den, derhalben sie auch dester weniger zu verantworten.
30 Es war ein niderlendischer edelman, nit weit von S. Thomas
gesessen, genannt . . . von Nurlet, derselbig hat dem deut-
schen kriegsvolk vil fründtschaft und liebs, so lang sie der
enden gelegen, bewisen. Als er nur zu diser hochzeit zu
Sant Tomas berüeft, do lued er die deutschen grafen uf
35 sein behausung gen Nurlet. Die furen zu im uf das wasser.
Also tractiert er sie, gleichwol uf ein vischtag, dermafsen,
das sollichs eim fürsten genug were gewesen, und wiewol
gar kain flaisch gespeiset, nochdann so warden der visch
ufser dem mer und süfsen wasser so überflüssig und so
40 manicherlai sorten ufgestellt, das solches zu verwundern.

*

5 gut] dürfte zu ergänzen sein. 21 Anddorf] hs. Auddorf.